

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

SYARIKAT PEMBORONG BERLESEN DISYAKI MELAKUKAN AKTIVITI PENYELEWENGAN MINYAK MASAK BERSUBSIDI DISERBU

PUTRAJAYA, 13 Disember 2021 – Bahagian Penguat Kuasa Kementerian Perdagangan Dalam Negeri dan Hal Ehwal Pengguna (KPDNHEP) telah berjaya membanteras aktiviti penyelewengan minyak masak bersubsidi paket 1kg menerusi operasi yang telah dijalankan di sebuah syarikat pemborong berlesen di Rawang, Selangor. Syarikat yang mempunyai lesen borong barang kawalan yang masih dalam tempoh sah ini disyaki mengaburi pihak berkuasa dengan menggunakan premisnya sebagai tempat untuk melakukan aktiviti penyelewengan minyak masak bersubsidi paket 1kg yang dipindahkan ke dalam bekas minyak masak industri sebelum dipasarkan.

2. Hasil serbuan dan pemeriksaan menemui lebih kurang **8,500kg** minyak masak bersubsidi paket 1kg disyaki untuk diseleweng. Terdapat dua (2) unit tangki berkapasiti 250 metrik tan masing-masing yang bersambungan berisi keseluruhannya berjumlah **19,120kg**, sisa plastik minyak masak bersubsidi paket 1kg yang telah digunting, peralatan untuk pemindahan minyak masak bersubsidi ke dalam tangki industri dan sebuah lori telah disita dengan nilai dianggarkan bernilai **RM 203,750.00**.

3. Hasil risikan dan siasatan awal mendapati, sindiket telah beroperasi hampir sembilan (9) bulan iaitu sejak mendapat lesen borong pada penghujung bulan Mac 2021 dengan mendapatkan bekalan minyak masak bersubsidi paket 1kg daripada pemborong-pemborong berlesen. Minyak masak bersubsidi paket 1kg ini seterusnya dilarikan menggunakan mesin dan dikumpulkan di dalam dua (2) unit tangki berkapasiti 250 metrik tan masing-masing yang bersambungan untuk **dipasarkan sebagai minyak masak industri**. Dalam serbuan tersebut, seorang pengarah syarikat berumur 20 tahun yang berada di dalam premis kejadian telah ditahan bagi membantu siasatan.

4. Kes disiasat di bawah Seksyen 21, Akta Kawalan Bekalan 1961 kerana memiliki barang kawalan minyak masak dalam keadaan menimbulkan syak munasabah untuk melakukan kesalahan di bawah 13 (1) Peraturan-Peraturan Kawalan Bekalan 1974.

5. Jika sabit kesalahan, boleh didenda tidak lebih RM 1,000,000.00 (Ringgit Malaysia Satu Juta) bagi orang perseorangan atau penjara tidak melebihi tiga tahun atau kedua-duanya sekali, dan bagi syarikat, sekiranya sabit kesalahan boleh didenda tidak melebihi RM 3,000,000.00 (Ringgit Malaysia Tiga Juta).

6. Bahagian Penguat Kuasa KPDNHEP tidak akan berkompromi dengan mana-mana pihak yang didapati terlibat dalam aktiviti ini dan akan mengambil tindakan tegas di bawah peruntukan undang-undang yang dikuatkuasakan oleh Kementerian ini.

7. Orang awam turut diminta untuk memberikan kerjasama dengan pihak Kerajaan dalam usaha untuk membanteras aktiviti penyelewengan barang bersubsidi termasuk minyak masak dan sekiranya orang ramai mempunyai sebarang maklumat yang berkaitan boleh mengemukakan aduan melalui saluran berikut:

- i. Whatsapp 019-279 4317
- ii. Portal e-aduan.kpdnhep
- ii. Call Centre 1-800-886-800
- iii. Emel e-aduan@kpdnhep.gov.my
- iv. Ez ADU KPDNHEP
- v. Pusat Arahan Penguatkuasaan (ECC)
03-8882 6088/6245

Azman bin Adam
Pengarah Penguat Kuasa
Kementerian Perdagangan Dalam Negeri
Dan Hal Ehwal Pengguna
PUTRAJAYA

13 Disember 2021